

正一先生傳 賜寶琴霞帔

正一先生姓司馬名承正字子微號白雲子溫人也事潘師正傳辟穀導引術無不通乃徧遊名山廬天台構層軒於壇上目為衆妙臺武后嘗召之未幾去與陳子昂盧藏用宋之間王適畢構李白孟浩然王維賀知章為仙宗十友睿宗復命其兄承禕就起之詔曰鍊師德超河上道邁浮丘高遊碧落之庭獨步清源之境朕初臨寶位久藉徽猷雖堯帝丕圖翹心齧缺軒皇御座遠想崆峒繄惟彼懷寧妨此願朝欽夕佇迹滯心飛欲遣使者專迎或恐鍊師嘉遁故令禕往願與同來披叙不遙先此無慮既至引入中掖延問其術對曰為道日損損之又損以至於無為夫心目所知見每損之尚不能已况攻異端而增智慮哉帝曰治身則爾治國若何對曰國由身也故游心於淡合氣於漠與物自然而無私焉則天下治帝嗟味曰廣成之言也遂賜寶琴霞紋帔以還